

Viadi ristgà tranter schanza e sceptica

Dieta per lantschar il project «Las-Alps-infoteca» a Cuira

DA MARTIN CABALZAR

■ Passa 100 personas da las regiuns alpinas han discutà venderdi e sonda en la sala dal cussegl grond a Cuira sch'ina chasa da medias da las Alps saja giavischada. La finamira saja auta, ussa saja quai da sa stentar per che questa visiun vegnia sustegnida e realisada, è il facit da questa dieta. Tant il parsura da la SRG.R sco il directur da RTR *Mariano Tschuor* ed il mainaproject *Ruedi Bruderer* en cuntents cun il resultat da la dieta. Dals referats, dals lavuratori e da las discussiuns saja resorti che l'idea da «Las-Alps-infoteca» per colliar il spazi cuminaivel da vita e la lavur cun la tecnologia e la finamira da daventar l'emprima adressa per intermediar cuntengs schurnalistics sur da las Alps saja ina gronda ed impurtanta incumbensa. La finamira saja auta e gagliarda, ma ins veglia la regnair en mira cun persuasiun e perseveranza, ha ditg Mariano Tschuor a la fin da la dieta.

Ilis proxims pass

Tar ils proxims pass tutgi uss ina giada dad evaluar ils resultats da la dieta e dals lavuratori. Silsuenter vul Mariano Tschuor udir anc ina giada da las differentas personas ed instituziuns involvidas, schebain lur decleranzas positivadas a Cuira tegnan vinavant ed han era cuntinuitad. Tschert ch'i drova era daners per financiar ina fasa da svilup. Per vegnir in pass vinavant dovri in mez milliun euros, la summa ch'è budgetada per pudair sviluppar e realisar Las-Alp-infoteca. Ins quinta cun ina lavur da preparaziun da dus onns. Plinavant duai vegnir installada ina grupp da lavur che sa fatschenta cun l'organisaziun concreta d'in management da project. A la dieta n'ha anc nagin pudì dar il consentiment definitiv per ina finanziaziun.

Participants da tut l'Europa

Las participantas ed ils participants a la dieta Las-Alp-infoteca a Cuira èn vegnids da Klagenfurt, Gardaina, Bregenz, Vuclina, Dolomitas, Piemont, Lyon, ma er or da l'entira Svizra e da numerus auters lieus da las Alps. Represchentadas èn era stadadas las grondas



Impressiuns da la dieta «Las-Alps-infoteca» en la sala dal cussegl grond a Cuira.

FOTO R. CANAL

chadainas da medias electronicas sco SF, ZDF, ORF, RAI, Bayerischer Rundfunk, Euronews e la chasa da medias Südostschweiz. Plinavant èn stadadas preschentadas personas da la Cipra, dal Club alpin talian e svizzer, da la rait da vischnancas en las Alps sco era represchentants da la confederaziun, dal chantun Grischun, dal Tirol dal sid, dal Montafun, sco era represchentants d'organisaziuns culturalas e d'universitads da differents pajais en las Alps. Remartgà han ins dentant era l'absenza da las organisaziuns Arge Alp e da Euro-montana.

Ina vusch cuminaivla per las Alps

Werner Bätzing da l'Universitad da Erlangen vesa per Las-Alps-infoteca ina incumbensa impurtanta per «intermediar in purtret realistic da las Alps» ad

ina vasta publicitad europeica enfin als gremis politics, perquai che l'Europa prenda decisiuns impurtantas che pertugan las regiuns alpinas. Ina chasa da medias fissia «in cler rinforz dals interess specificis dal territori alpin» sco quai che er divers votums or dal plenum han confermà. Per Bätzing saja quai in «rinforz da l'unitad en la diversitad» e la creaziun d'ina tala rait pudess «promover ina colliaziun sistemica da la discussiun da las Alps che surpasa ils cunfins statals, linguistics e da mentalitad». Werner Bätzing sa dumonda dentant era, sche Cuira è vairamain il lieu adattà per in tal center sco citad da las Alps ordaifer la UE. Il referent principal è dentant vegnì a la conclusiun ch'ils aspects positivs sco la plurilinguitad tradiziunala da la Svizra e dal Grischun sajan pli fermes, er sch'ils aspects negativs muntian in

grond obstachel pervi da la posiziun dapersai da la Svizra en dumondas da las Alps.

Barat da mainis enritgescha

Cussegliera federala *Eveline Widmer-Schlumpf* vules savair tge che sa chat-ta davos la proxima muntogna. Per la magistrata grischuna munta il contact sur vals e cunfins dapli che mo mirveglias. Quest barat inritgeschia nossa vita. Per pussibilitar questas experienzias sur cunfins en ina regiun alpina saja la plattafurma d'infurmaziun «Las-Alps-infoteca» in project interessant ch'ella persequiteschia cun interess. Sume-gliant argumentescha er il cusseglieir governativ *Claudio Lardi* che considerescha l'idea sco in «mussavia bainvis ed impurtant per rimnar, filtrar, elavurar ed intermediar infurmaziuns ord las Alps».

Per la Cipra international e ses president *Dominik Siegrist* èn «Las-Alps-infoteca» ina «gronda schanza per la collavuraziun aifer las Alps» nua ch'ins veglia «sa metter a disposiziun sco partenari». A moda sumeglianta s'expriman era *Regula Imhof*, la substituta da la secretaria generala da la Convenziun da las Alps e *Hans Lozza*, il schef da comunicaziun dal Parc Naziunal Svizzer. Omadus han discurti d'ina plivalur, d'ina vusch cuminaivla e d'in instrument per rinforzar l'identitad en las Alps. *Andrea Masüger*, il schef operativ da las medias Südostschweiz, n'ha betg vulì lavagar il plaschair visiunar dal project, ma el è sa dumandà sche la basa saja realistica avunda, ubain sch'ins planiseschia betg ina «chasa da medias» che nagin veglia finalmain alimentar. Dapli speranza ha il schef operativ da Euronews *Michael Peters* che lavura gia oz cun schurnalists or da 40 naziunalitads sveglia.

Marco Solari ha fatg curaschi als iniziants cun sias decleraziuns che «l'utopia dad oz è la realitad da damaun». Tenor Solari vegnan talas iniziativas savens recepidas sco irritaziuns da l'equiliber, fagend er allusiun a ses project per in'exposiziun naziunala en ils chantuns enturn il Gottard.

Prontadad da muventar insatge

Per conclusiun da la dieta ha *Andreas Weissen* constatà che la voluntad da muventar insatge saja avant maun. Per cuntanscher la fascinaziun necessaria per il project dovria quai dentant curaschi, temp e cunzunt personas che crajan en il project. D'impurtanza sajan la finala er ils daners, sco quai ch'ins ha constatà en las gruppas da lavur. Quels sajan dentant avant maun, sch'ins vesia il niz da la chaussa. Gist en la fasa da la discussiun da princip dovri perseveranza e flexibilitad en plirs regards, uschia era quai che pertutga la dumonda dal lieu da domicil da Las-Alps-infoteca, ha manegia Weissen.

Ina saira culturala cun Acaovo, *Ernst Bromeis*, *Mario Pacchioli* e *Laurent Brunetti* è stada ordvart divertenta ed ha gidà ad enfirmir ils contacts persunals dals represchentants da las differentas regiuns alpinas.

Preventiv da 14 milliuns francs

Il parlament dalla Regiun Surselva seraduna l'otra jamna a Glion

■ (anr/hh) Il parlament dalla Regiun Surselva sefatschenta questa jamna dil preventiv pigl onn 2011. Quel quenta cun ina sviulta da biebein 14 milliuns francs. Plinavon ha il parlament da decider da principi davart igl acquist dil baghetg che survescha dapresent alla Scola professiunala da tgira grischuna e ch'ei en possess dalla claustra da s. Giusep. El center dalla sessiun che ha liug mesjamna proxima en casa cumin a Glion stattan il preventiv ed il program da lavur 2011. Il preventiv quenta cun entradas ed expensas da rondud 14,2 milliuns francs. Quei ei rondud 5,5 milliuns francs dapli ch'igl onn current. Il motiv persuerter ei il sectur dalla formaziun. Cun l'entschatta digl onn vegnent surpren la Regiun Surselva numnadamein la Scola professiunala mercantila, la Scola media mercantila, il sectur dalla formaziun dils carschi, la Scola professiunala e la Scola vinavon el rom dil niev Center da scolaziun e formaziun Surselva.

Pliers projects

Il program da lavur descriva en empre-

ma lingia las incaricas principalas e specialas digl onn vegnent. Per elavurar il concept da detagl sco basa per la decisiun davart la cumpra dil baghetg dalla Scola professiunala da tgira grischuna a Glion ha la suprastonza integrat il preventiv ina summa da 25 000 francs.

In importo da 20 000 francs ei reservaus per l'elavuraziun d'in niev signet per la Regiun Surselva. La regiun intenda da realisar la cunvegientscha da prestaziun cun il cantun davart il management dalla regiun. Quel ha la finamira da far la regiun pli attractiva sco liug da habitar e d'economia. Persuenter vul la suprastonza impunder 150 000 francs sco era 75 000 francs per la realisaziun dil fondo davart il svilup regional. 50 000 francs ein previ per la planisaziun strategica e la realisaziun dil preproject per la tiarza etappa da deponia a Plaun Grond. Per ademplir las pretensiuns dil reglament davart il sustegn dallas uniuns da sport dalla regiun ein 40 000 francs reservai.

In fondo per il svilup

Mesjamna proxima ha il parlament era da decider davart il reglament concernent in fondo per il svilup regional. La fin 2011 va igl emprend program dalla nova politica regionala dil cantun a fin. Las empremas experientschas ch'il cantun e las regiuns han fatg en quei connex muossan claramein che las regiuns drovan sviluppers regiunals en plazza cumpleina. La Surselva ademplescha gia quella premissa. Confederaziun, cantun e regiuns finanzieschan comunablamain las expensas per in tal post. Fertion che la confederaziun ed il cantun surprendan ils cuosts da persunal effectivs finanzieschan las regiuns il plaz da lavur. Plinavon s'obligheschan ellas d'endrizzar in fondo per il svilup regional cun ina summa da 75 000 francs. Il mument corrispunda quella summa alla contribuziun che las vischnaucas prestan vid il management dalla regiun. Quei fondo duei star a disposiziun en emprema lingia per examinar projects en fuorma da concepts, preprojects e plans da fatschen-

ta. La suprastonza dalla Regiun Surselva sustegn la direcziun nova dil management regional ed ei perschadida ch'ils sviluppers dallas regiuns san ademplir lur pensums sulettamein en piazzas cumpleinas.

In baghetg per la Regiun?

Il parlament regional ha plinavon da sefatschentar dalla damonda da principi concernent la cumpra dil baghetg dalla Scola professiunala da tgira grischuna a Glion. Quei edific ei en possess dalla claustra da s. Giusep. Aschlunsch ch'il parlament s'accorda cun la proposta dalla suprastonza duei la cumpra vegnir examinada en detagl. Denter auter vegn ei ad esser necessari da sclarir tgei cuosts ch'ina sanaziun dil baghetg caschunass. Quei duei succeder en cooperaziun cun il Spital regional Surselva che demuossa medemamein interess per ulteriur spazi. Il parlament ha plinavon da tractar in'incumbensa concernent la realisaziun d'ina regurdientscha durabla en honor da *Carlo Janka*.

■ MUSTÉR

12,2 milliuns expensas

(anr) Il quen current da Mustér preveda expensas da 12 203 400 ed entradas da 12 225 200 francs, aschia ch'ei seresulta in pign surpli d'entras per 2011. Il quen d'investiziun quenta cun expensas da 2 795 000 ed entradas da 1 052 500 francs, pia investiziuns nettas da 1 742 500 francs. Ils projects ils pli impurtants ein la sanaziun dalla Via Faltscharidas, la colligaziun da Mumpé Medel alla serenera ed ina sanaziun dil center da sport e cultura. Il preventiv 2011 ei approbaus chila resalva dil referendum facultativ. Il cantun ha danovamein renviu da surprender la Via Faltscharidas, damai che la distanza denter il vitg da Mustér e Faltscharidas seigi fetg cuorta. Sco il gerau *Iso Mazzetta* ha declarau eis ei previu da sanar la via naven dalla sbuccada dalla Via Alpsu entochen ella Val Heiser. Leu ein entgens parcadis previ. Perencunter croda la piazza da sememar cunquai che camiuns cun carr annex san ussa carrar entochen Dieni. Ils cuosts per igl entir project muntan a 670 000 francs. Da quels surpren la vischaunca 70%.

Alla radunonza dil venderdis sera ha il cussegl medemamein approbau la lescha forestala. Quella ei vegnida adattada alla nova constituiun communal.